

摘藻堂四庫全書薈要

子部

欽定四庫全書薈要卷一萬三百七十二

子部

管子卷二十

唐 房玄齡 註

形勢解第六十四

管子解二

山者物之高者也惠者主之高行也慈者父母之高行也忠者臣之高行也孝者子婦之高行也故山高而不崩則祈羊至主惠而不解則民奉養父母慈而不解則子婦順臣下忠而不解則爵祿至子婦孝而不解則美

名附故節高而不解則所欲得矣解則不得故曰山高而不崩則祈羊至矣

淵者衆物之所生也能深而不涸則沈玉極主者人之所仰而生也能寬裕純厚而不苛忤則民人附父母者子婦之所受教也能慈仁教訓而不失理則子婦孝臣下者主之所用也能盡力事上則當於主子婦者親之所以安也能孝弟順親則當於親故淵涸而無水則沈玉不至主苛而無厚則萬民不附父母暴而無恩則子

婦不親臣下隨而不忠則卑辱困窮子婦不安親則禍  
憂至故淵不涸則所欲者至涸則不至故曰淵深而不  
涸則沈玉極

天覆萬物制寒暑行日月次星辰天之常也治之以理  
終而復始主牧萬民治天下莅百官主之常也治之以法  
終而復始和子孫屬親戚父母之常也治之以義終而  
復始敦敬忠信臣下之常也以事其主終而復始愛親  
善養思敬奉教子婦之常也以事其親終而復始故

天不失其常則寒暑得其時日月星辰得其序主不失其常則羣臣得其義百官守其事父母不失其常則子孫和順親戚相驩臣下不失其常則事無過失而官職政治子婦不失其常則長幼理而親疎和故用常者治失常者亂天未嘗變其所以治也故曰天不變其常地生養萬物地之則也治安百姓主之則也教護家事父母之則也正諫死節臣下之則也盡力共養子婦之則也地不易其則故萬物生焉主不易其則故百姓安焉

父母不易其則故家事辦焉臣下不易其則故主無過  
失子婦不易其則故親養備具故用則者安不用則者  
危地未嘗易其所以安也故曰地不易其則

春者陽氣始上故萬物生夏者陽氣畢上故萬物長秋  
者陰氣始下故萬物收冬者陰氣畢下故萬物藏故春  
夏生長秋冬收藏四時之節也賞賜刑罰主之節也四  
時未嘗不生殺也主未嘗不賞罰也故曰春秋冬夏不  
更其節也

天覆萬物而制之地載萬物而養之四時生長萬物而收藏之古以至今不更其道故曰古今一也

蛟龍水蟲之神者也乘於水則神立失於水則神廢人主天下之有威者也得民則威立失民則威廢蛟龍待得水而後立其神人主待得民而後成其威故曰蛟龍得水而神可立也

虎豹獸之猛者也居深林廣澤之中則人畏其威而載之人主天下之有勢者也深居則人畏其勢故虎豹去

其幽而近於人則人得之而易其威人主去其門而迫於民則民輕之而傲其勢故曰虎豹託幽而威可載也風漂物者也風之所漂不避貴賤美惡雨濡物者也雨之所墮不避小大強弱風雨至公而無私所行無常鄉人雖遇漂濡而莫之怨也故曰風雨無鄉而怨怒不及也

人主之所以令則行禁則止者必令於民之所好而禁於民之所惡也民之情莫不欲生而惡死莫不欲利而



惡害故上令於生利人則令行禁於殺害人則禁止令之所以行者必民樂其政也而令乃行故曰貴有以行令也

人主之所以使下盡力而親上者必爲天下致利除害也故德澤加於天下惠施厚於萬物父子得以安羣生得以育故萬民驩盡其力而樂爲上用入則務本疾作以實倉廩出則盡節死敵以安社稷雖勞苦卑辱而不敢告也此賤人之所以忘其卑也故曰賤有以忘卑

起居時飲食節寒暑適則身利而壽命益起居不時飲食不節寒暑不適則形體累而壽命損人情而侈則貧力而儉則富夫物莫虛至必有以也故曰壽夭貧富無徒歸也法立而民樂之令出而民銜之法令之合於民心如符節之相得也則主尊顯故曰銜令者君之尊也人主出言順於理合於民情則民受其辭民受其辭則名聲章故曰受辭者名之運也明主之治天下也靜其民而不擾佚其民而不勞不擾則民自循不勞則民自

試故曰上無事而民自試

人主立其度量陳其分職明其法式以蒞其民而不以言先之則民循正所謂抱蜀者祠器也故曰抱蜀不言而廟堂既修

將將鴻鵠貌之美者也貌美故民歌之德義者行之美者也德義美故民樂之民之所歌樂者美行德義也而明主鴻鵠有之故曰鴻鵠將將維民歌之

濟濟者誠莊事斷也多士者多長者也周文王誠莊事

斷故國治其羣臣明理以佐主故主明主明而國治竟  
內被其利澤殷民舉首而望文王願爲文王臣故曰濟  
濟多士殷民化之

紂之爲主也勞民力奪民財危民死寃暴之令加於百  
姓憎毒之使施於天下故大臣不親小民疾怨天下叛  
之而願爲文王臣者紂自取之也故曰紂之失也

無儀法程式蜚蜚而無所定謂之蜚蓬之間蜚蓬之間明主  
不聽也無度之言明主不許也故曰蜚蓬之間不在所

賓

道行則君臣親父子安諸生育故明主之務務在行道  
不顧小物燕爵物之小者也故曰燕爵之集道行不顧  
明主之動靜得理義號令順民心誅殺當其罪賞賜當  
其功故雖不用犧牲珪璧禱於鬼神鬼神助之天地與  
之舉事而有福亂主之動作失義理號令逆民心誅殺  
不當其罪賞賜不當其功故雖用犧牲珪璧禱於鬼神  
鬼神不助天地不與舉事而有禍故曰犧牲珪璧不足

以享鬼神

主之所以爲功者富強也故國富兵強則諸侯服其政  
鄰敵畏其威雖不用寶幣事諸侯諸侯不敢犯也主之  
所以爲罪者貧弱也故國貧兵弱戰則不勝守則不固  
雖出名器重寶以事鄰敵不免於死亡之患故曰主功  
有素寶幣奚爲

羿古之善射者也調和其弓矢而堅守之其操弓也審  
其高下有必中之道故能多發而多中明主猶羿也平

和其法審其廢置而堅守之有必治之道故能多舉而多當道者羿之所以必中也主之所以必治也射者弓弦發矢也故曰羿之道非射也

造父善馭馬者也善視其馬節其飲食度量馬力審其足走故能取遠道而馬不罷明主猶造父也善治其民度量其力審其技能故立功而民不困傷故術者造父之所以取遠道也主之所以立功名也馭者操轡也故曰造父之術非馭也

奚仲之爲車器也方圜曲直皆中規矩鈎繩故機旋相  
得用之牢利成器堅固明主猶奚仲也言辭動作皆中  
術數故衆理相當上下相親巧者奚仲之所以爲器也  
主之所以爲治也斲削者斤刀也故曰奚仲之巧非斲  
削也

民利之則來害之則去民之從利也如水之走下於四  
方無擇也故欲來民者先起其利雖不召而民自至設  
其所惡雖召之而民不來也故曰召遠者使無爲焉



莅民如父母則民親愛之道之純厚遇之有實雖不言  
曰吾親民而民親矣莅民如仇讎則民疎之道之不厚  
遇之無實詐僞竝起雖言曰吾親民民不親也故曰親  
近者言無事焉

明主之使遠者來而近者親也爲之在心所謂夜行者  
心行也能心行德則天下莫能與之爭矣故曰唯夜行  
者獨有之乎

爲主而賊爲父母而暴爲臣下而不忠爲子婦而不孝

四者人之大失也大失在身雖有小善不得爲賢所謂  
平原者下澤也雖有小封不得爲高故曰平原之隰奚  
有於高

爲主而惠爲父母而慈爲臣下而忠爲子婦而孝四者  
人之高行也高行在身雖有小過不爲不肖所謂大山  
者山之高者也雖有小隈不以爲深故曰大山之隈奚  
有於深

毀訾賢者之謂訾推譽不肖之謂衡

爲制  
切

訾衡言之人得

用則人主之明蔽而毀譽之言起任之大事則事不成而禍患至故曰訾讟之人勿與任大

明主之慮事也爲天下計者謂之讜臣讜臣則海內被其澤澤布於天下後世享其功久遠而利愈多故曰讜臣者可與遠舉

聖人擇可言而後言擇可行而後行偷得利而後有害偷得樂而後有憂者聖人不爲也故聖人擇言必顧其累擇行必顧其憂故曰顧憂者可與致道

小人者枉道而取容適主意而偷說備利而偷得如此者其得之雖速禍患之至亦急故聖人去而不用也故曰其計也速而憂在近者徃而勿召也舉一而爲天下長利者謂之舉長舉長則被其利者衆而德義之所見遠故曰舉長者可遠見也

天之裁大故能兼覆萬物地之裁大故能兼載萬物人主之裁大故容物多而衆人得比焉故曰裁大者衆之所比也

貴富尊顯民歸樂之人主莫不欲也故欲民之懷樂已者必服道德而勿厭也而民懷樂之故曰美人之懷定服而勿厭也

聖人之求事也先論其理義計其可否故義則求之不義則止可則求之不可則止故其所得事者常爲身寶小人之求事也不論其理義不計其可否不義亦求之不可亦求之故其所得事者未嘗爲賴也故曰必得之事不足賴也

聖人之諾已也先論其理義計其可否義則諾不義則已可則諾不可則已故其諾未嘗不信也小人不義亦諾不可亦諾言而必諾故其諾未必信也故曰必諾之言不足信也

謹於一家則立於一家謹於一鄉則立於一鄉謹於一國則立於一國謹於天下則立於天下是故其所謹者小則其所立亦小其所謹者大則其所立亦大故曰小謹者不大立

海不辭水故能成其大山不辭土石故能成其高明主

不厭人故能成其衆士不厭學故能成其聖

餐疾移切  
嫌食貌

者多所惡也諫者所以安主也食者所以肥體也主惡  
諫則不安人餐食則不肥故曰餐食者不肥體也

言而語道德忠信孝弟者此言無棄者天公平而無私  
故美惡莫不覆地公平而無私故小大莫不載無棄之  
言公平而無私故賢不肖莫不用故無棄之言者參伍  
於天地之無私也故曰有無棄之言者必參之於天地

矣

明主之官物也任其所長不任其所短故事無不成而  
功無不立亂主不知物之各有所長所短也而責必備  
夫慮事定物辯明禮義人之所長而蝮蟺上如由切  
下于元切之  
所短也緣高出險蝮蟺之所長而人之所短也以蝮蟺  
之所長責人故其令廢而責不塞故曰墜岸三仞人之  
所大難也而蝮蟺飲焉

明主之舉事也任聖人之慮用衆人之力而不自與焉故



事成而福生亂主自智也而不因聖人之慮矜奮自功而  
不因衆人之力專用已而不聽正諫故事敗而禍生故曰  
伐矜好專舉事之禍也馬者所乘以行野也故雖不行於  
野其養食馬也未嘗解惰也民者所以守戰也故雖不守  
戰其治養民也未嘗解惰也故曰不行其野不違其馬  
天生四時地生萬財以養萬物而無取焉明主配天地  
者也教民以時勸之以耕織以厚民養而不伐其功不  
私其利故曰能予而無取者天地之配也

解情簡慢以之事主則不忠以之事父母則不孝以之  
起事則不成故曰怠倦者不及也

以規矩爲方園則成以尺寸量長短則得以法數治民  
則安故事不廣於理者其成若神故曰無廣者疑神

事主而不盡力則有刑事父母而不盡力則不親受業  
問學而不加務則不成故朝不勉力務進夕無見功故  
曰朝忘其事夕失其功

中情信誠則名譽美矣修行謹敬則尊顯附矣中無情

實則名聲惡矣修行慢易則污辱生矣故曰邪氣襲內正色乃衰也

爲人君而不明君臣之義以正其臣則臣不知於爲臣之理以事其主矣故曰君不君則臣不臣

爲人父而不明父子之義以教其子而整齊之則子不知爲人子之道以事其父矣故曰父不父子不子

君臣親上下和萬民輯故主有令則民行之上禁則民不犯君臣不親上下不和萬民不輯故令則不行禁

則不止故曰上下不和令乃不行

言辭信動作莊衣冠正則臣下肅言辭慢動作虧衣冠  
情則臣下輕之故曰衣冠不正則賓者不肅儀者萬物  
之程式也法度者萬民之儀表也禮義者尊卑之儀表  
也故動有儀則令行無儀則令不行故曰進退無儀則  
政令不行

人主者溫良寬厚則民愛之整齊嚴莊則民畏之故民  
愛之則親畏之則用夫民親而爲用主之所急也故曰

且懷且威則君道備矣

人主能安其民則事其主如事其父母故主有憂則憂之有難則死之主視民如土則民不爲用主有憂則不憂有難則不死故曰莫樂之則莫哀之莫生之則莫死之

民之所以守戰至死而不哀者上之所以加施於民者厚也故上施厚則民之報上亦厚上施薄則民之報上亦薄故薄施而厚責君不能得之於臣父不能得之於

子故曰往者不至來者不極

道者扶持衆物使得生育而各終其性命者也故或以  
治鄉或以治國或以治天下故曰道之所言者一也而  
用之者異聞道而以治一鄉親其父子順其兄弟正其  
習俗使民樂其上安其土爲一鄉主幹者鄉之人也故  
曰有聞道而好爲鄉者一鄉之人也

民之從有道也如飢之先食也如寒之先衣也如暑之  
先陰也故有道則民歸之無道則民去之故曰道往者

其人莫來道來者其人莫往

道者所以變化身而之正理者也故道在身則言自順  
行自正事君自忠事父自孝遇人自理故曰道之所設  
身之化也

天之道滿而不溢盛而不衰明主法象天道故貴而不  
驕富而不奢行理而不惰故能長守貴富久有天下而  
不失也故曰持滿者與天

明主救天下之禍安天下之危者也夫救禍安危者必

待萬民之爲用也而後能爲之故曰安危者與人

地大國富民衆兵強此盛滿之國也雖已盛滿無德厚  
以安之無度數以治之則國非其國而民無其民也故  
曰失天之度雖滿必涸

臣不親其主百姓不信其吏上下離而不和故雖自安  
必且危之故曰上下不和雖安必危

主有天道以禦其民則民一心而奉其上故能貴富而  
久王天下失天之道則民離叛而不聽從故主危而不



得久王天下故曰欲王天下而失天之道天下不可得而王也

人主務學術數務行正理則化變日進至於大功而愚人不知也亂主淫佚邪枉日爲無道至於滅亡而不自知也故曰莫知其爲之其功既成莫知其舍之也藏之而無形

古者三王五伯皆人主之利天下者也故身貴顯而子孫被其澤桀紂幽厲皆人主之害天下者也故身困傷

而子孫蒙其禍故曰疑今者察之古不知來者視之往  
神農教耕生穀以致民利禹身決瀆斬高橋下以致民  
利湯武征伐無道誅殺暴亂以致民利故明王之動作  
雖異其利民同也故曰萬事之任也異趣而同歸古今  
一也

棟生橈不勝任則屋覆而人不怨者其理然也弱子慈  
母之所愛也不以其理動者下瓦則慈母答之故以其  
理動者雖覆屋不爲怨不以其理動者下瓦必答故曰

生棟覆屋怨怒不及弱子下瓦慈母操筆

行天道出公理則遠者自親廢天道行私為則子母相怨故曰天道之極遠者自親人事之起近親造怨

古者武王地方不過百里戰卒之衆不過萬人然能戰勝攻取立為天子而世謂之聖王者知為之之術也桀紂貴為天子富有海內地方甚大戰卒甚衆而身死國亡為天下僂者不知為之之術也故能為之則小可為大賤可為貴不能為之則雖為天子人猶奪之也故曰

巧者有餘而拙者不足也

明主上不逆天天下不墮地故天子之時地生之財亂主上逆天道下絕地理故天不予時地不生財故曰其功順天者天助之其功逆天者天違之

古者武王天之所助也故雖地小而民少猶之爲天子也桀紂天之所違也故雖地大民衆猶之困辱而死亡也故曰天之所助雖小必大天之所違雖大必削

與人交多詐僞無情實偷取一切謂之烏集之交烏集

之交初雖相驩後必相咄故曰鳥集之交雖善不親  
聖人之與人約結也上觀其事君也內觀其事親也必  
有可知之理然後約結約結而不襲於理後必相倍故  
曰不重之結雖固必解道之用也貴其重也

明主與聖人謀故其謀得與之舉事故其事成亂主與  
不肖者謀故其計失與之舉事故其事敗夫計失而事  
敗此與不可之罪故曰毋與不可

明主度量人力之所能爲而後使焉故令於人之所能

爲則令行使於人之所能爲則事成亂主不量人力令  
於人之所不能爲故其令廢使於人之所不能爲故其  
事敗夫令出而廢舉事而敗此強不能之罪也故曰毋  
強不能

狂惑之人告之以君臣之義父子之理貴賤之分不信  
聖人之言也而反害傷之故聖人不告也故曰毋告不  
知

與不肖者舉事則事敗使於人之所不能爲則令廢告

狂惑之人則身害故曰與不可強不能告不知謂之勞而無功

常以言翹明其與人也其愛人也其有德於人也以此爲友則不親以此爲交則不結以此有德於人則不報故曰見與之友幾於不親見愛之交幾於不結見施之德幾於不報四方之所歸心行者也

明主不用其智而任聖人之智不用其力而任衆人之力故以聖人之智思慮者無不知也以衆人之力起事

者無不成也能自去而因天下之智力起則身逸而福多亂主獨用其智而不任衆人之智獨用其力而不任衆人之力故其身勞而禍多故曰獨任之國勞而多禍明主內行其法度外行其理義故鄰國親之與國信之有患則鄰國憂之有難則鄰國救之亂主內失其百姓外不信於鄰國故有患則莫之憂也有難則莫之救也外內皆失孤特而無黨故國弱而主辱故曰獨國之君卑而不威



明主之治天下也必用聖人而後天下治婦人之求夫家也必用媒而後家事成故治天下而不用聖人則天下乖亂而民不親也求夫家而不用媒則醜耻而人不信也故曰自媒之女醜而不信

明主者人未之見而有親心焉者有使民親之之道也故其位安而民徃之故曰未之見而親焉可以徃矣堯舜古之明主也天下推之而不倦譽之而不厭久遠而不忘者有使民不忘之道也故其位安而民來之故

曰久而不忘焉可以來矣

日月昭察萬物者也天多雲氣蔽蓋者衆則日月不明  
人主猶日月也羣臣多姦立私以擁蔽主則主不得昭  
察其臣下臣下之情不得上通故姦邪日多而人主愈  
蔽故曰日月不明天不易也

山物之高者也地險穢不平易則山不得見人主猶山  
也左右多黨比周以壅其主則主不得見故曰山高而  
不見地不易也

人主出言不逆於民心不悖於理義其所言足以安天下者也人唯恐其不復言也出言而離父子之親疏君臣之道害天下之衆此言之不可復者也故明主不言也故曰言而不可復者君不言也人主身行方正使人有禮遇人有理行發於身而爲天下法式者人唯恐其不復行也身行不正使人暴虐遇人不信行發於身而爲天下笑者此不可復之行故明主不行也故曰行而不可再者君不行也

言之不可復者其言不信也行之不可再者其行賊暴也故言而不信則民不附行而賊暴則天下怨民不附天下怨此滅亡之所從生也故明主禁之故曰凡言之不可復行之不可再者有國者之大禁也

管子卷二十

謹案卷十九第七頁前五行其種蘊忍注蘊忍草  
名刊本蘊忍二字倒據爾雅及本草綱目改

第九頁前八行衣帶必飭刊本飭作飾據古詩紀  
改

第十一頁後八行問何所趾刊本何所二字倒據  
古詩紀改


卷二十第一頁後三行則沈玉極刊本極作至據  
本篇及卷一形勢篇改

第四頁後八行此賤人之所以忘其卑也刊本忘  
訛亡據卷一形勢篇改

第七頁前一行犧牲珪璧不足以享鬼神刊本脫  
神字據卷一形勢篇增

第十七頁前四行異趣而同歸刊本趣訛起據卷  
一形勢篇改





總校官庶吉士臣侍朝

校對官檢討臣王鍾健

謄錄監生臣曹錫璜



欽定四庫全書薈要

子部  
管子卷二十一



欽定四庫全書薈要卷一萬三百七十三


子部

管子卷二十一

唐 房玄齡 註

立政九敗解第六十五

管子解三

 唯毋聽寢兵則羣臣賓客莫敢言兵然則內之不  
知國之治亂外之不知諸侯強弱如是則城郭毀壞莫  
之築補甲弊兵彫莫之修繕如是則守圉之備毀矣遼  
遠之地謀邊竟之士修百姓無圉敵之心故曰寢兵之

說勝則險阻不守

人君唯毋聽兼愛之說則視天下之民如其民視國如  
吾國如是則無并兼攘奪之心無覆軍敗將之事然則  
射御勇力之士不厚祿覆軍殺將之臣不賚爵如是則  
射御勇力之士出在外矣我能毋攻人可也不能令人  
毋攻我彼求地而予之非吾所欲也不予而與戰必不  
勝也彼以教士我以毆衆彼以良將我以無能其敗必  
覆軍殺將故曰兼愛之說勝則士卒不戰

人君唯無好全生則羣臣皆全其生而生又養生養何也曰滋味也聲色也然後爲養生然則從欲妄行男女無別反於禽獸然則禮義廉恥不立人君無以自守也故曰全生之說勝則廉恥不立

人君唯無聽私議自覺則民退靜隱伏窟穴就山非世間上輕爵祿而賤有司然則令不行禁不止故曰私議自覺之說勝則上令不行

人君唯無好金玉貨財必欲得其所好然則必有以易

之所以易之者何也大官尊位不然則尊爵重祿也如是則不肖者在上位矣然則賢者不爲下智者不爲謀信者不爲約勇者不爲死如是則毆國而捐之也故曰金玉貨財之說勝則爵服下流

人君唯毋聽羣徒比周則羣臣朋黨蔽美揚惡然則國之情僞不見於上如是則朋黨者處前寡黨者處後夫朋黨者處前賢不肖不分則爭奪之亂起而君在危殆之中矣故曰羣徒比周之說勝則賢不肖不分

人君唯毋聽觀樂玩好則敗凡觀樂者宮室臺池珠玉  
聲樂也此皆費財盡力傷國之道也而以此事君者皆  
姦人也而人君聽之焉得毋敗然則府倉虛蓄積竭且  
姦人在上則壅遏賢者而不進也然則國適有患則優  
倡侏儒起而議國事矣是毆國而捐之也故曰觀樂玩  
好之說勝則姦人在上位

人君唯毋聽請謁任舉則羣臣皆相為請然則請謁得  
於上黨與成於鄉如是則貨財行於國法制毀於官羣

臣務佞而求用然則無爵而譽無祿而富故曰請謁任舉之說勝則繩墨不正

人君唯無聽諂諛飾過之言則敗奚以知其然也夫諂臣者常使其主不悔其過不更其失者也故主惑而不自知也如是則謀臣死而諂臣尊矣故曰諂諛飾過之說勝則巧佞者用

版法解第六十六

管子解四

版法者法天地之位象四時之行以治天下四時之行

有寒有暑聖人法之故有文有武天地之位有前有後  
有左有右聖人法之以建經紀春生於左秋殺於右夏  
長於前冬藏於後生長之事文也收藏之事武也是故  
文事在左武事在右聖人法之以行法令以治事理凡  
法事者操持不可以不正操持不正則聽治不公聽治  
不公則治不盡理事不盡應治不盡理則疏遠微賤者  
無所告誨事不盡應則功利不盡舉功利不盡舉則國  
貧疎遠微賤者無所告誨則下饒故曰凡將立事正彼



天植天植者心也天植正則不私近親不孽疎遠不私  
近親不孽疎遠則無遷利無隱治無遷利無隱治則事  
無不舉物無遺者欲見天心明以風雨故曰風雨無違  
遠近高下各得其嗣萬物尊天而貴風雨所以尊天者  
爲其莫不受命焉也所以貴風雨者爲其莫不待風而  
動待雨而濡也若使萬物釋天而更有所受命釋風而  
更有所仰動釋雨而更有所仰濡則無爲尊天而賢風  
雨矣今人君之所尊安者爲其威立而令行也其所以

能立威行令者為其威利之操莫不在君也若使威利之操不專在君而有所分散則君日益輕而威利日衰侵暴之道也故曰三經既飭君乃有國

乘夏方長審治刑賞必明經紀陳義設法斷事以理虛氣平心乃去怒喜若倍法弃令而行怒喜禍亂乃生上位乃殆故曰喜無以賞怒無以殺喜以賞怒以殺怨乃起令乃廢驟令而不行民心乃外外之有徒禍乃始牙衆之所忿置不能圖

冬既閉藏百事盡止往事畢登來事未起方冬無事慎  
觀終始審察事理事有先易而後難者有始不足見而  
終不可及者此常利之所以不舉事之所以困者也事  
之先易者人輕行之人輕行之則必困難成之事始不  
足見者人輕弃之人輕弃之則必失不可及之功夫數  
困難成之事而時失不可及之功衰耗之道也是故明  
君審察事理慎觀終始爲必知其所成成必知其所用  
用必知其所利害爲而不知所成成而不知所用用而

不知所利害謂之妄舉妄舉者其事不成其功不立故  
曰舉所美必觀其所終廢所惡必計其所窮

凡人君者欲民之有禮義也夫民無禮義則上下亂而  
賢賤爭故曰慶勉敦敬以顯之富祿有功以勸之爵  
賢有名以休之

凡人君者欲衆之親上鄉意也欲其從事之勝任也而  
衆者不愛則不親不親則不明不教順則不鄉意是故  
明君兼愛以親之明教順以道之便其勢利其備愛其

力而勿奪其時以利之如此則衆親上鄉意從事勝任矣故曰兼愛無邊是謂君心必先順教萬民鄉風旦暮利之衆乃勝任

治之本二一曰人二曰事人欲必用事欲必工人有逆順事有稱量人心逆則人不用事失稱量則事不工事不工則傷人不用則怨故曰取人以已成事以質成事以質者用稱量也取人以已者度恕而行也度恕者度之於已也已之所不安勿施於人故曰甯用財慎施報

察稱量故用財不可以嗇用力不可以苦用財嗇則費  
用力苦則勞矣奚以知其然也用力苦則事不工事不  
工而數復之故曰勞矣用財嗇則不當人心不當人心  
則怨起用財而生怨故曰費怨起而不復反衆勞而不  
得息則必有崩弛堵壞之心故曰民不足令乃辱民苦  
殃令不行施報不得禍乃始昌禍昌而不悟民乃自圖  
凡國無法則衆不知所為無度則事無機有法不正有  
度不直則治辟治辟則國亂故曰正法直度罪殺不赦

殺僂必信民畏而懼武威既明令不再行

凡民者莫不惡罰而畏罪是以人君嚴教以示之明刑  
罰以致之故曰頓卒怠倦以辱之罰罪有過以懲之殺  
僂犯禁以振之

治國有三器亂國有六攻明君能勝六攻而立三器則  
國治不肖之君不能勝六攻而立三器故國不治三器  
者何也曰號令也斧鉞也祿賞也六攻者何也親也譽  
也貨也色也巧佞也玩好也三器之用何也曰非號令

無以使下非斧鉞無以畏衆非祿賞無以勸民六攻之  
敗何也曰雖不聽而可以得存雖犯禁而可以得免雖  
無功而可以得富夫國有不聽而可以得存者則號令  
不足以使下有犯禁而可以得免者則斧鉞不足以畏  
衆有無功而可以得富者則祿賞不足以勸民號令不足  
以使下斧鉞不足以畏衆祿賞不足以勸民則人君無  
以自守也然則明君奈何明君不爲六者變更號令不  
爲六者疑錯斧鉞不爲六者益損祿賞故曰植固而不



動奇邪乃恐奇革邪化令往民移

凡人君者覆載萬民而兼有之燭臨萬族而事使之是故以天地日月四時為主為質以治天下天覆而無外也其德無所不在地載而無弃也安固而不動故莫不生殖聖人法之以覆載萬民故莫不得其職姓得其職姓則莫不為用故曰法天合德象地無親日月之明無私故莫不得光聖人法之以燭萬民故能審察則無遺善無隱姦無遺善無隱姦則刑賞信必刑賞信必則善

勸而姦止故曰參於日月四時之行信必而著明聖人法之以事萬民故不失時功故曰伍於四時

凡衆者愛之則親利之則至是故明君設利以致之明愛以親之徒利而不愛則衆至而不親徒愛而不利則衆親而不至愛施俱行則說君臣說朋友說兄弟說父子愛施所設四固不能守故曰說在愛施

凡君所以有衆者愛施之德也愛有所移利有所并則不能盡有故曰有衆在廢私

愛施之德雖行而無私內行不修則不能朝遠方之君  
是故正君臣上下之義飾父子兄弟夫妻之義飾男女  
之別別疏數之差使君德臣忠父慈子孝兄愛弟敬禮  
義章明如此則近者親之遠者歸之故曰召遠在修近  
閉禍在除怨非有怨乃除之所事之地常無怨也凡禍  
亂之所生生於怨咎怨咎所生生於非理是以明君之  
事衆也必經使之必道施報必當出言必得刑罰必理  
如此則衆無鬱怨之心無憾恨之意如此則禍亂不生

上位不殆故曰閑禍在除怨也

凡人君所以尊安者賢佐也佐賢則君尊國安民治無  
佐則君卑國危民亂故曰修長存乎任賢

凡人者莫不欲利而惡害是故與天下同利者天下持  
之擅天下之利者天下謀之天下所謀雖立必隳天下  
所持雖高不危故曰安高在乎同利凡所謂能以所不  
利利人者舜是也舜耕歷山陶河濱漁雷澤不取其利  
以教百姓百姓舉利之此所謂能以所不利利人者也

所謂能以所不有予人者武王是也武王伐紂士卒往者人有書社入殷之日決鉅橋之粟散鹿臺之錢殷民大說此所謂能以所不有予人者也

桓公謂管子曰今子教寡人法天合德合德長久合德而兼覆之則萬物受命象地無親無親安固無親而兼載之則諸生皆殖參於日月無私葆光無私而兼照之則美惡不隱然則君子之爲身無好無惡然已乎管子對曰不然夫學者所以自化所以自撫故君子惡稱人

之惡惡不忠而怨妬惡不公議而名當稱惡不位下而位上惡不親外而內放此五者君子之所恐行而小人之所以亡況人君乎

明法解第六十七

管子解五

明主者有術數而不可欺也審於法禁而不可犯也察於分職而不可亂也故羣臣不敢行其私賢臣不得蔽賤近者不得塞遠孤寡老弱不失其所職竟內明辨而不相踰越此之謂治國故明法曰所謂治國者主道明

也

明主者上之所以一民使下也私術者下之所以侵上  
亂主也故法廢而私行則人主孤特而獨立人臣羣黨  
而成朋如此則主弱而臣強此之謂亂國故明法曰所  
謂亂國者臣術勝也

明主在上位有必治之勢則羣臣不敢為非是故羣臣  
之不敢欺主者非愛主也以畏主之威勢也百姓之爭  
用非以愛主也以畏主之法令也故明主操必勝之數

以治必用之民處必尊之勢以制必服之臣故令行禁止主尊而臣卑故明法曰尊君卑臣非計親也以勢勝也

明主之治也縣爵祿以勸其民民有利於上故主有以使之立刑罰以威其下下有畏於上故主有以牧之故無爵祿則主無以勸民無刑罰則主無以威衆故人臣之行理奉命者非以愛主也且以就利而避害也百官之奉法無姦者非以愛主也欲以愛爵祿而避罰也故



明法曰百官論職非惠也刑罰必也

人主者擅生殺處威勢操令行禁止之柄以御其羣臣  
此主道也人臣者處卑賤奉主令守本任治分職此臣  
道也故主行臣道則亂臣行主道則危故上下無分君  
臣共道亂之本也故明法曰君臣共道則亂

人臣之所以畏恐而謹事主者以欲生而惡死也使人  
不欲生不惡死則不可得而制也夫生殺之柄專在大  
臣而主不危者未嘗有也故治亂不以法斷而決於重

臣生殺之柄不制於主而在羣下此寄生之主也故人主專以其威勢予人則必有劫殺之患專以其法制予人則必有亂亡之禍如此者亡主之道也故明法曰專授則失

凡爲主而不得行其令廢法而恣羣臣威嚴已廢權勢已奪令不得出羣臣弗爲用百姓弗爲使竟內之衆不制則國非其國而民非其民如此者滅主之道也故明法曰令求不出謂之滅

明主之道卑賤不待尊賢而見大臣不因左右而進百官條通羣臣顯見有罰者主見其罪有賞者主知其功見知不悖賞罰不差有不蔽之術故無壅遏之患亂主則不然法令不得至於民疏遠鬲閉而不得聞如此者壅遏之道也故明法曰令出而留謂之壅

人臣之所以乘而為姦者擅主也臣有擅主者則主令不得行而下情不上通人臣之力能鬲君臣之間而使美惡之情不揚聞禍福之事不通徹人主迷惑而無從

悟如此者塞主之道也故明法曰下情不上通謂之塞  
明主者兼聽獨斷多其門戶羣臣之道下得明上賤得  
言聳故姦人不敢欺亂主則不然聽無術數斷事不以  
叅伍故無能之士上通邪枉之臣專國主明蔽而聰塞  
忠臣之欲謀諫者不得進如此者侵主之道也故明法  
曰下情上而道止謂之侵

人主之治國也莫不有法令賞罰具故其法令明而賞  
罰之所立者當則主尊顯而姦不生其法令逆而賞罰

之所立者不當則羣臣立私而壅塞之朋黨而劫殺之故明法曰滅塞侵壅之所生從法之不立也

法度者主之所以制天下而禁姦邪也所以牧領海內而奉宗廟也私意者所以生亂長姦而害公正也所以壅蔽夫正而危亡也故法度行則國治私意行則國亂明主雖心之所愛而無功者不賞也雖心之所憎而無罪者弗罰也案法式而驗得失非法度不留意焉故明法曰先王之治國也不淫意於法之外

明主之治國也案其當宜行其正理故其當賞者羣臣  
不得辭也其當罰者羣臣不敢避也夫賞功誅罪所以  
爲天下致利除害也草茅弗去則害禾穀盜賊弗誅則  
傷良民夫舍公法而行私惠則是利姦邪而長暴亂也  
行私惠而賞無功則是使民偷幸而望於上也行私惠  
而赦有罪則是使民輕上而易為非也夫舍公法用私  
意明主不為也故明法曰不為惠於法之內

凡人主莫不欲其民之用也使民用者必法立而令行

也故治國使衆莫如法禁淫止暴莫如刑故貧者非不欲奪富者財也然而不敢者法不使也強者非不能暴弱也然而不敢者畏法誅也故百官之事案之以法則姦不生暴慢之人誅之以刑則禍不起羣臣竝進策之以數則私無所立故明法曰動無非法者所以禁過而外私也

人主之所以制臣下者威勢也故威勢在下則主制於臣威勢在上則臣制於主夫蔽主者非塞其門守其戶

也然而令不行禁不止所欲不得者失其威勢也故威勢獨在於主則羣臣畏敬法政獨出於主則天下服德故威勢分於臣則令不行法政出於臣則民不聽故明主之治天下也威勢獨在於主而不與臣共法政獨制於主而不從臣出故明法曰威不兩錯政不二門

明主者一度量立表儀而堅守之故令下而民從法者天下之程式也萬事之儀表也吏者民之所懸命也故明主之治也當於法者賞之違於法者誅之故以法誅罪則



民就死而不怨以法量功則民受賞而無德也此以法舉錯之功也故明法曰以法治國則舉錯而已

明主者有法度之制故羣臣皆出於方正之治而不敢爲姦百姓知主之從事於法也故吏之所使者有法則民從之無法則止民以法與吏相距下以法與上從事故詐僞之人不得欺其主嫉妬之人不得用其賊心讒諛之人不得施其巧千里之外不敢擅爲非故明法曰有法度之制者不可巧以詐僞

權衡者所以起輕重之數也然而人不事者非心惡利也權不能為之多少其數而衡不能為之輕重其量也人知事權衡之無益故不事也故明主在上位則官不得枉法吏不得為私民知事吏之無益故財貨不行於吏權衡平正而待物故姦詐之人不得行其私故明法曰有權衡之稱者不可欺以輕重

尺寸尋丈者所以得長短之情也故以尺寸量短長則萬舉而萬不失矣是故尺寸之度雖富貴衆強不為益

長雖貧賤卑辱不爲損短公平而無所偏故姦詐之人不能誤也故明法曰有尋丈之數者不可差以長短

國之所以亂者廢事情而任非譽也故明主之聽也言者責之以其實譽人者試之以其官言而無實者誅吏而亂官者誅是故虛言不敢進不肖者不敢受官亂主則不然聽言而不督其實故羣臣以虛譽進其黨任官而不責其功故愚污之吏在庭如此則羣臣相推以美名相假以功伐務多其交而不為主用故明法曰主釋

法以譽進能則臣離上而下比周矣以黨舉官則民務交而不求用矣

亂主不察臣之功勞譽衆者則賞之不審其罪過毀衆者則罰之如此者則邪臣無功而得賞忠正無罪而有罰故功多而無賞則臣不務盡力行正而有罰則賢聖無從竭能行貨財而得爵祿則汚辱之人在官寄託之人不肖而位尊則民倍公法而趨有勢如此則慙愿之人失其職而廉潔之吏失其治故明法曰官之失其治

也是主以譽為賞而以毀為罰也

平吏之治官也行法而無私則姦臣不得其利焉此姦臣之所務傷也人主不參驗其罪過以無實之言誅之則姦臣不能無事賢重而求推譽以避刑罰而受祿賞焉故明法曰喜賞惡罰之人離公道而行私術矣

姦臣之敗其主也積漸積微使主迷惑而不自知也上則相為候望於主下則買譽於民譽具黨而使主尊之毀不譽者而使主廢之其所利害者主聽而行之如此

則羣臣皆忘主而趨私交矣故明法曰比周以相爲慝  
是故忘主必交以進其譽

主無術數則羣臣易欺之國無明法則百姓輕爲非是  
故姦邪之人用國事則羣臣仰利害也如此則姦人爲  
之視聽者多矣雖有大義主無從知之故明法曰交衆  
譽多外內朋黨雖有大姦其蔽主多矣

凡所謂忠臣者務明法術日夜佐主明於度數之理以  
治天下者也姦邪之臣知法術明之必治也治則姦臣

困而法術之士顯是故邪之所務事者使法無明主無  
悟而已得所欲也故方正之臣得用則姦邪之臣困傷  
矣是方正之與姦邪不兩進之勢也姦邪在主之側者  
不能勿惡也惟惡之則必候主間而日夜危之人主不  
察而用其言則忠臣無罪而困死姦臣無功而富貴故  
明法曰忠臣死於非罪而邪臣起於非功

富貴尊顯久有天下人主莫不欲也令行禁止海內無  
敵人主莫不欲也蔽欺侵凌人主莫不惡也失天下滅

宗廟人主莫不惡也忠臣之欲明法術以致主之所欲而除主之所惡者姦臣之擅主者有以私危之則忠臣無從進其公正之數矣故明法曰所死者非罪所起者非功然則為人臣者重私而輕公矣

亂主之行爵祿也不以法令案功勞其行刑罰也不以法令案罪過而聽重臣之所言故臣有所欲賞主爲賞之臣欲有所罰主爲罰之廢其公法專聽重臣如此故羣臣皆務其黨重臣而忘其主趨重臣之門而不庭故



明法曰十至於私人之門不一至於庭

明主之治也明於分職而督其成事勝其任者處官不勝其任者廢免故羣臣皆竭能盡力以治其事亂主則不然故羣臣處官位受厚祿莫務治國者期於管國之重而擅其利牧漁其民以富其家故明法曰百慮其家不一圖其國

明主在上位則竟內之衆盡力以奉其主百官分職致治以安國家亂主則不然雖有勇力之士大臣私之而

非以奉其主也雖有聖智之士大臣私之非以治其國也故屬數雖衆不得進也百官雖具不得制也如此者有人主之名而無其實故明法曰屬數雖衆非以尊君也百官雖具非以任國也此之謂國無人

明主者使下盡力而守法分故羣臣務尊主而不敢顧其家臣主之分明上下之位審故大臣各處其位而不敢相鬻亂主則不然法制廢而不行故羣臣得務益其家君臣無分上下無別故羣臣得務相貴如此者非朝

臣少也衆不為用也故明法曰國無人者非朝臣衰也  
家與家務相益不務尊君也大臣務相貴而不任國也  
人主之張官置吏也非徒尊其身厚奉之而已也使之  
奉主之法行主之令以治百姓而誅盜賊也是故其所  
任官者大則爵尊而祿厚其所任官者小則爵卑而祿  
薄爵祿者人主之所以使吏治官也亂主之治也處尊  
位受厚祿養所與佞而不以官為務如此者則官失其  
能矣故明法曰小臣持祿養交不以官為事故官失職

明主之擇賢人也言勇者試之以軍言智者試之以官  
試於軍而有功者則舉之試於官而事治者則用之故  
以戰功之事定勇怯以官職之治定愚智故勇怯愚智  
之見也如白黑之分亂主則不然聽言而不試故妄言  
者得用任人而不官故不肖者不困故明主以法案其  
言而求其實以官任其身而課其功專任法而不自舉焉  
故明法曰先王之治國也使法擇人不自舉也

凡所謂功者安主上利萬民者也夫破軍殺將戰勝攻

取使主無危亡之憂而百姓無死虜之患此軍士之所  
以為功者也奉主法治竟內使強不凌弱衆不暴寡萬  
民驩盡其力而奉養其主此吏之所以為功也匡主之  
過救主之失明理義以道其主主無邪僻之行蔽欺之  
患此臣之所以為功也故明主之治也明分職而課功  
勞有功者賞亂治者誅誅賞之所加各得其宜而主不  
自與焉故明法曰使法量功不自度也

明主之治也審是非察事情以度量案之合於法則行

不合於法則止功充其言則賞不充其言則誅故言智能者必有見功而後舉之言惡敗者必有見過而後廢之如此則士上通而莫之能妬不肖者困廢而莫之能舉故明法曰能不可蔽而敗不可飾也

明主之道立民所欲以求其功故為爵祿以勸之立民所惡以禁其邪故為刑罰以畏之故案其功而行賞案其罪而行罰如此則羣臣之舉無功者不敢進也毀無罪者不能退也故明法曰譽者不能進而誹者不能退

也

制羣臣擅生殺主之分也縣令仰制臣之分也威勢尊顯主之分也卑賤畏敬臣之分也令行禁止主之分也奉法聽從臣之分也故君臣相與高下之處也如天之與地也其分畫之不同也如白之與黑也故君臣之間明別則主尊臣卑如此則下之從上也如響之應聲臣之法主也如景之隨形故上令而下應主行而臣從以令則行以禁則止以求則得此之謂易治故明法曰君

臣之間明別則易治

明主操術任臣下使羣臣效其智能進其長技故智者效其計能者進其功以前言督後事所效當則賞之不當則誅之張官任吏治民案法試課成功守法而法之身無煩勞而分職故明法曰主雖不身下爲而守法爲之可也

臣乘馬第六十八

管子輕重一

桓公問管子曰請問乘馬管子對曰國無儲在令桓公



曰何謂國無儲在令管子對曰一農之量壤百畝也春事二十五日之內桓公曰何謂春事二十五日之內管子對曰日至六十日而陽凍釋七十日而陰凍釋陰凍釋而執耒百日不執耒故春事二十五日之內耳也今君立扶臺五衢之衆皆作君過春而不止民失其二十五日則五衢之內阻弃之地也起一人之繇百畝不舉起十人之繇千畝不舉起百人之繇萬畝不舉起千人之繇十萬畝不舉春已失二十五日而尚有起夏作是

春失其地夏失其苗秋起繇而無止此之謂穀地數亡  
穀失於時君之衡藉而無止民食什伍之穀則君已藉  
九矣有衡求幣焉此盜暴之所以起刑罰之所以衆也  
隨之以暴謂之內戰桓公曰善哉筴乘馬之數求盡也  
彼王者不奪民時故五穀興豐五穀興豐則士輕祿民  
簡賞彼善為國者使農夫寒耕暑耘力歸於上女勤於  
織微而織歸於府者非怨民心傷民意高下之筴不得  
不然之理也桓公曰為之奈何管子曰虞國得筴乘馬

之數矣桓公曰何謂筴乘馬之數管子曰百畝之夫子  
之筴率二十七日為子之春事資子之幣春秋子穀大  
登國穀之重去分謂農夫曰幣之在子者以為穀而廩  
之州里國穀之分在上國穀之重再十倍謂遠近之縣  
里邑百官皆當奉器械備曰國無幣以穀准幣國穀之  
擴一切什九還穀而應穀國器皆資無藉於民此有虞  
之筴乘馬也

乘馬數第六十九

管子輕重二

桓公問管子曰有虞筴乘馬已行矣吾欲立筴乘馬爲之奈何管子對曰戰國修其城池之功故其國常失其地用王國則以時行也桓公曰何謂以時行管子對曰出准之令守地用人筴故開闔皆在上無求於民霸國守分上分下游於分之間而用足王國守始國用一不足則加一焉國用二不足則加二焉國用三不足則加三焉國用四不足則加四焉國用五不足則加五焉國用六不足則加六焉國用七不足則加七焉國用八不

足則加八焉國用九不足則加九焉國用十不足則加  
十焉人君之守高下歲藏三分十年則必有五年之餘  
若歲凶旱水洄民失本則修宮室臺榭以前無狗後無  
彘者爲庸故修宮室臺榭非麗其樂也以平國筴也今  
至於其亡筴乘馬之君春秋冬夏不知時終始作功起  
衆立宮室臺榭民失其本事君不知其失諸春筴又失  
諸夏秋之筴數也民無糧賣子數矣猛毅之人淫暴貧  
病之民乞請君行律度焉則民被刑僇而不從於主上

此筴乘馬之數亡也乘馬之准與天下齊准彼物輕則見泄重則見射此鬪國相泄輕重之家相奪也至於王國則持流而止矣桓公曰何謂持流管子對曰有一人耕而五人食者有一人耕而四人食者有一人耕而三人食者有一人耕而二人食者此齊力而功地田筴相圓此國筴之時守也君不守以筴則民且守於上此國筴流已桓公曰乘馬之數盡於此乎管子對曰布織財物皆立其貲財物之貲與幣高下穀獨賈獨賤桓公曰

何謂獨賈獨賤管子對曰穀重而萬物輕穀輕而萬物重公曰賤筴乘馬之數奈何管子對曰郡縣上吏之壤守之若干間壤守之若干下壤守之若干故相壤定籍而民不移振貧補不足下樂上故以上壤之滿補下壤之衆章四時守諸闔閭民之不移也如廢方於地此之謂筴乘馬之數也

問乘馬第七十闕

管子輕重三

管子卷二十一

欽定四庫全書薈要卷一萬三百七十四

子部

管子卷二十二

唐 房玄齡 註

事語第七十一

管子輕重四

桓公問管子曰事之至數可聞乎管子對曰何謂至數  
桓公曰泰奢教我曰帷蓋不修衣服不衆則女事不泰  
俎豆之禮不致牲諸侯太牢大夫少牢不若此則六畜  
不育非高其臺榭美其宮室則羣材不散此言何如管



子曰非數也桓公曰何謂非數管子對曰此定壤之數也彼天子之制壤方千里齊諸侯方百里負海子七十里男五十里若胥臂之相使也故准徐疾羸不足雖在下也不爲君憂彼壤狹而欲舉與大國爭者農夫寒耕暑芸力歸於上女勤於緝績微織功歸於府者非怨民心傷民意也非有積蓄不可以用人非有積財無以勸下泰奢之數不可用於危隘之國桓公曰善

桓公又問管子曰佚田謂寡人曰善者用非其有使非

其人何不因諸侯權以制天下管子對曰佚田之言非也彼善為國者壤辟舉則民留處倉廩實則知禮節且無委致圍城脆致衝夫不定內不可以持天下佚田之言非也管子曰歲藏一十年而十也歲藏二五年而十也穀十而守五綈素滿之五在上故視歲而藏縣時積歲國有十年之蓄富勝貧勇勝怯智勝愚微勝不微有義勝無義練士勝毆衆凡十勝者盡有之故發如風雨動如雷霆獨出獨入莫之能禁止不待權輿故佚田之

言非也桓公曰善

海王第七十二

管子輕重五

桓公問於管子曰吾欲藉於臺雉何如管子對曰此毀成也吾欲藉於樹木管子對曰此伐生也吾欲藉於六畜管子對曰此殺生也吾欲藉於人何如管子對曰此隱情也桓公曰然則吾何以爲國管子對曰唯官山海爲可耳桓公曰何謂官山海管子對曰海王之國謹正鹽筴

海王言以負海之利而王其業

桓公曰何謂正鹽筴也

正稅也

管子對

曰十口之家十人食鹽百口之家百人食鹽終月大男

食鹽五升少半

少半猶劣薄也

大女食鹽三升少半吾子食鹽

二升少半

吾子謂小男小女也

此其大厯也

厯數

鹽百升而釜

鹽十兩

七銖一秦十分之一為升當米六合四勺也百升之鹽七十六斤十二兩十九銖二釐為釜當米六斗四升

令鹽之重升加分彊釜五十也

分彊半彊也令使鹽官稅其鹽之重每一斗加

半合為彊而取之則一釜之鹽得五十合而為之彊

升加一彊釜百也升加二彊

釜二百也鍾二千

十釜之鹽七百六十八斤為鍾當米六斛四斗是也

十鍾二萬

百鍾二十萬千鍾二百萬萬乘之國人數問口千萬也

舉其大數而言之也問口

謂大男大女之所食鹽也

禹筭之商日二百萬

禹讀爲偶偶對

也商計也對其大男大女食鹽者之口數而立

筭以計所稅之鹽一日計二百萬合爲二百鍾十日二

千萬一月六千萬萬乘之國正九百萬也

萬乘之國大男大女食鹽

者千萬人而稅之鹽一日二百鍾十日二千鍾一月六千鍾也今又施其稅數以千萬人如九百萬人之數則所稅之鹽一日百八十鍾十日

月人三十錢之籍爲錢

千八百鍾一月五千四百鍾

三千萬

又變其五千四百鍾之鹽而籍其錢計一月每人籍錢三十凡十萬人爲錢三萬萬矣以籍之

數而比其常籍則當一

國而有三十萬人矣

今吾非籍之諸君吾子而有二

國之籍者六千萬

諸君謂老男老女也六十以上爲老男五十以上爲老女也既不籍於老

男老女又不籍於小男少女乃能以千萬人而當三十萬人者蓋鹽官之利耳鹽官之利既然則鐵官之利可知也鹽官之利當一國而三萬人鐵官之利當一國而三萬人焉故能有二國之籍者六千萬人耳其常籍人之數猶在此外使君施令曰吾將籍於諸君吾子則必囂號今

夫給之鹽筴則百倍歸於上人無以避此者數也今鐵

官之數曰一女必有一鍼一刀若其事立若猶然後耕者必

有一耒一耜一鉋若其事立大鋤謂之鉋羊昭反行服連輦名所以載作

器人輶羊昭反輦居玉反者大車駕馬必有一斤一鋸一錐一鑿

若其事立不爾而成事者天下無有今鍼之重加一也

三十鍼一人之籍

鍼之重每十分加一分爲彊而取之則一女之籍得三十鍼也矣

刀

之重加六五六三十五刀一人之籍也

刀之重每十分加六分以爲彊

而取之五六爲三十也則一女之籍得五刀

耜鐵之重加七三耜鐵一人之

籍也

耜鐵之重每十分加七分以爲彊而取之則一農之籍得三耜鐵也

其餘輕重皆准

此而行

其器彌重其加彌多

然則舉臂勝

音升

事無不服藉者桓公

曰然則國無山海不王乎管子曰因人之山海假之名

有海之國

雖無海而假名有海則亦雖無山而假名有山

讎鹽於吾國

彼國有鹽而糴

於吾國爲舊耳

釜十五吾受而官出之以百

受取也假令彼鹽平價釜當十錢者

吾又加五錢而取之所以來之也既得彼鹽

我未與其

本事也

與用也本  
事本鹽也

受人之事以重相推

以重推謂加五  
錢之類也推猶

度此人用之數也

彼人所有而  
皆為我用之

### 國蓄第七十三

管子輕重六

國有十年之蓄而民不足於食皆以其技能望君之祿也君有山海之金而民不足於用是皆以其事業交接於君上也故人君挾其食守其用據有餘而制不足故民無不累於上也五穀食米民之司命也黃金刀幣民



之通施也故善者執其通施以御其司命故民力可得

而盡也夫民者親信而必利海內皆然民予則喜奪則

怒民情皆然先王知其然故見予之形不見奪之理與

使由之不可使知之故民愛可洽於上也洽通也租籍者在工商所

以彊其兩反求也租稅者所慮而請也在農曰租稅慮猶計也王

霸之君去其所以彊求廢其所慮而請故天下樂從也

利出於一孔者凡言利者不必貸利慶賞威刑皆是其國無敵出二孔者

其兵不誦誦與屈同屈窮也出三孔者不可以舉兵出四孔者

其國必亡先王知其然故塞民之養

養利也  
羊向反

隘其利途

故予之在君奪之在君貧之在君富之在君故民之戴  
上如日月親君若父母凡將爲國不通於輕重不可爲  
籠以守民不能調通民利不可以語制爲大治是故萬  
乘之國有萬金之賈千乘之國有千金之賈然者何也  
國多失利則臣不盡其忠士不盡其死矣歲有凶穰故  
穀有賤賤令有緩急故物有輕重然而人君不能治故  
使蓄賈游市乘民之不給百倍其本分地若一彊者能

守分財若一智者能收智者有什倍人之功

以一取什

愚者

有不廢本之事

廢猶償也音庚

然而人君不能調故民有相百

倍之生也夫民富則不可以祿使也貧則不可以罰威

也法令之不行萬民之不治貧富之不齊也且君引鋤

鋤籌也  
丁劣反

量用耕田發草上得其數矣民人所食人有若

千步畝之數矣計本量委

委積也

則足矣然而民有飢餓

不食者何也穀有所藏也

言一國之內耕墾之數君悉知之凡人計口授田家族多

少足以自給而人乏於食者謂豪富之家收藏其穀故也

人君鑄錢立幣民庶之通

施也

錢幣無補於飢寒之用人君所立以均制財物通交有無使人之所求各得其欲

人有若

千百千之數矣然而人事不及用不足者何也利有所

并藏也

民事謂常費也言人之所有多少各隨其分而自足君上不能均調其事則豪富并藏財貨專

擅其利是故人常費不給以致匱乏然則人君非能散積聚鈞羨

餘也

不足

分并財利而調民事也則君雖彊本趣耕

本謂務農趣讀為促

而

自爲鑄幣而無已乃今使民下相役耳惡能以爲治乎

言人君若不能權其利門制其輕重雖鑄幣無限極而與人徒使豪富侵奪貧弱終不能致理也

歲適

美則市糴無予而狗彘食人食歲適凶則市糴釜十緡

而道有餓民然則豈壤力固不足而食固不贍也哉夫  
往歲之糶賤狗彘食人食故來歲之民不足也物適賤  
則半力而無予民事不償其本物適賤則什倍而不可  
得民失其用然則豈財物固寡而本委不足也哉夫民  
利之時失而物利之不平也故善者委施於民之所不  
足操事於民之所有餘夫民有餘則輕之故人君歛之  
以輕民不足則重之故人君散之以重歛積之以輕散  
行之以重故君必有什倍之利而財之擴

古莫反

可得而

平也

凡輕重之大利以重射輕以賤泄平萬物之滿虛隨財  
准平而不變衡絕則重見人君知其然故守之以准平  
使萬室之都必有萬鍾之藏藏絀千萬使千室之都必  
有千鍾之藏藏絀百萬春以奉耕夏以奉芸耒耜械器  
鍾鑲糧食畢取贍於君故大賈蓄家不得豪奪吾民矣  
然則何君養其本謹也春賦以斂繒帛夏貸以收秋實  
蓋方春蠶家闕乏而賦與之約收其繒帛  
方夏農人闕乏亦賦與之約取其穀實也 是故民無廢

事而國無失利也

卷二十二  
人之所乏君悉與之則  
豪商富人不得擅其利

凡五穀者萬物之主也穀賤則萬物必賤穀賤則萬物必貴兩者為敵則不俱平故人君御穀物之秩相勝而操事於其不平之間

秩積也食為人天故五穀之要可與萬物為敵其價常不俱平所以

人君視兩事之委積可彼此相勝輕重於其間則國利不散也

故萬民無籍而國利歸

於君也夫以室廡籍謂之毀成

小曰室大曰廡音武是以使人毀壞廡室以

六畜籍謂之止生

畜許救反是使人  
不競牧養也

以田畝籍謂之禁耕

是止其  
耕稼也

以正人籍謂之離情

正數之人若丁壯也  
離情謂離心也

以正戶

籍謂之養羸

羸謂大賈畜家也正數之戶既避其籍則至浮浪為大賈蓄家之所役屬增其利耳

五者不可畢用故王者徧行而不盡也故天子籍於幣  
諸侯籍於食中歲之穀糶石十錢大男食四石月有四  
十之籍大女食三石月有三十之籍吾子食二石月有  
二十之籍歲凶穀粃糶石二十錢則大男有八十之籍  
大女有六十之籍吾子有四十之籍

按古之石准今之三斗三升三合平

歲每石稅十錢凶歲稅二十者非必稅其人謂於操事輕重之間約收其利也

是人君非發號

令收穡而戶籍也彼人君守其本委謹而男女諸君吾



子無不服籍者也

書欽也委所委積之物也謹嚴也言人君不用下令稅欽於人但嚴守利

途輕重在我則無所逃其稅也

一人廩食十人得餘十人廩食百人得

餘百人廩食千人得餘夫物多則賤寡則賅散則輕聚則重人君知其然故視國之羨不足而御其財物穀賤則以幣予食布帛賤則以幣予衣視物之輕重而御之以准故賅賤可調而君得其利前有萬乘之國而後有千乘之國謂之抵國前有千乘之國而後有萬乘之國謂之距國壤正方四面受敵謂之衢國以百乘衢處謂

之託食之君千乘衢處壤削少半萬乘衢處壤削大半  
何謂百乘衢處託食之君也夫以百乘衢處危懾圍阻  
千乘萬乘之間夫國之君不相中舉兵而相攻必以為  
扞格蔽圉之用有功利不得鄉大臣死於外分壤而功  
列陳繫纍獲虜分賞而祿是壤地盡於功賞而稅臧殫  
於繼孤也是特名羅於爲君耳無壤之有號有百乘之  
守而實無尺壤之用故謂託食之君然則大國內款小  
國用盡何以及此曰百乘之國官賦軌符乘四時之朝

夕御之以輕重之准然後百乘可及也千乘之國封天  
財之所殖械器之所出財物之所生視歲之滿虛而輕  
重其祿然後千乘可足也萬乘之國守歲之滿虛乘民  
之緩急正其號令而御其大准然後萬乘可資也玉起  
於禺<sub>音虞</sub>氏金起於汝漢珠起於赤野東西南北距周七  
千八百里水絕壤斷舟車不能通先王為其途之遠其  
至之難故託用於其重以珠玉為上幣以黃金為中幣  
以刀布為下幣三幣握之則非有補於煖也食之則非

有補於飽也先王以守財物以御民事而平天下也  
今人君籍求於民令曰十日而具則財物之賈什去一  
令曰八日而具則財物之賈什去二令曰五日而具則  
財物之賈什去半朝令而夕具則財物之賈什去九先  
王知其然故不求於萬民而籍於號令也

山國軌第七十四

管子輕重七

桓公問管子曰請問官國軌管子對曰田有軌人有軌  
用有軌鄉有軌人事有軌幣有軌縣有軌國有軌不通

於軌數而欲爲國不可桓公曰行軌數奈何對曰某鄉田若干人事之准若干穀重若干曰某縣之人若干田若干幣若干而中用穀重若干而中幣終歲度人食其餘若干曰某鄉女勝事者終歲績其功業若干以功業直時而橫古莫反之終歲人已衣被之後餘衣若干別羣

軌相壤宜桓公曰何謂別羣軌相壤宜管子對曰有莞蒲之壤有竹箭檀栢之壤有汜下漸澤之壤有水潦魚鼈之壤今四壤之數君皆善官而守之則籍於財物不

籍於人畝十畝之壤君不以軌守則民且守之民有過  
移長力不以本爲得此君失也桓公曰軌意安出管子  
對曰不陰據其軌皆下制其上桓公曰此若言何謂也  
管子對曰某鄉田若干食者若干某鄉之女事若干餘  
衣若干謹行州里曰田若干人若干人衆田不度食若  
干曰田若干餘食若干必得軌程此調之泰軌也然後  
調立環乘之幣田軌之有餘於其人食者謹置公幣焉  
大家衆小家寡山田間田曰終歲其食不足於其人若

千則置公幣焉以滿其准重歲豐年五穀登謂高田之  
萌曰吾所寄幣於子者若干鄉穀之穡若干請爲子什  
減三穀爲上幣爲下高田撫間田山不被穀十倍山田  
以君寄幣振其不贍未淫失也高田以時撫於主上坐  
長加十也女貢織帛苟合于國奉者皆置而券之以鄉  
穡市准曰上無幣有穀以穀准幣環穀而應筴國奉決  
穀反准賦軌幣穀廩重有加十謂大家委貲家曰上且  
修游人出若干幣謂鄰縣曰有實者皆勿左右不贍則

且為人馬假其食民鄰縣四面皆橫穀坐長而十倍上  
下令曰貨家假幣皆以穀准幣直幣而唐之穀為下幣  
為上百都百縣軌據穀坐長十倍環穀而應假幣國幣  
之九在上一在下幣重而萬物輕斂萬物應之以幣幣  
在下萬物皆在上萬物重十倍府官以市橫出萬物隆  
而止國軌布於未形據其已成乘令而進退無求於民  
謂之國軌

桓公問於管子曰不籍而贍國為之有道乎管子對曰



軌守其時有官天財何求於民桓公曰何謂官天財管

子對曰泰春民之功繇

與招反

泰夏民之令之所止令之

所發

謂山澤之所禁發

泰秋民令之所止令之所發泰冬民令

之所止令之所發此皆民所以時守也此物之高下之

時也此民之所以相并兼之時也君守諸四務桓公曰

何謂四務管子對曰泰春民之且所用者君已廩之矣

泰夏民之且所用者君已廩之矣泰秋民之且所用者

君已廩之矣泰冬民之且所用者君

廩藏也言四時人之所要皆先備之

所謂耒耜器械種饌糧食必取  
要焉則豪人大賈不得擅其利

已廩之矣泰春功布日

春縑衣夏單衣捍籠纍箕勝羸屑糞若干日之功用人  
若干無貲之家皆假之械器勝羸屑糞公衣功已而歸  
公衣折券故力出於民而用出於上春十日不害耕事  
夏十日不害芸事秋十日不害歛實冬二十日不害除  
田此之謂時作桓公曰善吾欲立軌官為之奈何管子  
對曰鹽鐵之筴足以立軌官桓公曰奈何管子對曰龍  
夏之地布黃金九千以幣貲金巨家以金小家以幣周

岐山至於崢丘之西塞丘者山邑之田也布幣稱貧富而調之周壽陵而東至少沙者中田也據之以幣巨家以金小家以幣三壤已撫而國穀再什倍梁渭陽瑣之牛馬滿齊衍請毆之顛齒量其高壯曰國爲師旅戰車毆就歛子之牛馬上無幣請以穀視市橫而庚子牛馬爲上粟二家二家散其粟反准牛馬歸於上

管子曰請立貲於民有田倍之內毋有其外外皆爲貲壤被鞍之馬千乘齊之戰車之具具於此無求於民此

去丘邑之籍也國穀之朝夕在上山林廩械器之高下  
在上春秋冬夏之輕重在上行田疇田中有木者謂之  
穀賊宮中四榮樹其餘曰害女功宮室械器非山無所  
仰然後君立三等之租於山曰握以下者為柴楂把以  
上者為室奉三圍以上為棺槨之奉柴楂之租若干室  
奉之租若干棺槨之租若干

管子曰鹽鐵撫軌穀一廩十君常操九民衣食而繇下  
安無怨咎去其田賦以租其山巨家重葬其親者服重

祖小家菲葬其親者服小祖巨家美修其宮室者服重  
祖小家為室廬者服小祖上立軌於國民之貧富如加  
之以繩謂之國軌

山權數第七十五

管子輕重八

桓公問管子曰請問權數管子對曰天以時為權地以  
財為權人以力為權君以令為權失天之權則人地之  
權亡桓公曰何為失天之權則人地之權亡管子對曰  
湯七年旱禹五年水民之無糧賣子者湯以莊山之金

鑄幣而贖民之無糧賣子者禹以歷山之金鑄幣而贖  
民之無糧賣子者故天權失人地之權皆失也故王者  
歲守十分之參三年與少半成歲三十一年而藏十一  
年與少半藏參之一不足以傷民而農夫敬事力作故  
天毀塋凶旱水洑民無入於溝壑乞請者也此守時以  
待天權之道也桓公曰善吾欲行三權之數爲之奈何  
管子對曰梁山之陽靖千見 緬夜石之幣天下無有管  
子曰以守國穀歲守一分以行五年國穀之重什倍異

日管子曰請立幣國銅以二年之粟顧之立黔落力重與天下調彼重則見射輕則見泄故與天下調泄者失權也見射者失策也不備天權下相求備准下陰相隸此刑罰之所起而亂之之本也故平則不平民富則不如貧委積則虛矣此三權之失也已桓公曰守三權之數奈何管子對曰大豐則藏分阨亦藏分桓公曰阨者所以益也何以藏分管子對曰隘則易益也一可以爲十十可以爲百以阨守豐阨之准數一上十豐之筭數

十去九則吾九爲餘於數筴豐則三權皆在君此之謂國權

桓公問於管子曰請問國制管子對曰國無制地有量桓公曰何謂國無制地有量管子對曰高田十石間田五石庸田三石其餘皆屬諸荒田地量百畝一夫之力也粟賈一粟賈十粟賈三十粟賈百其在流筴者百畝從中千畝之筴也然則百乘從千乘也千乘從萬乘也故地無量國無筴桓公曰善今欲爲大國大國欲爲天



下不通權筴其無能者矣

桓公曰今行權奈何管子對曰君通於廣狹之數不以狹畏廣通於輕重之數不以少畏多此國筴之大者也桓公曰善蓋天下視海內長譽而無止為之有道乎管子對曰有曰軌守其數准平其流動於未形而守事已成物一也而十是九為用徐疾之數輕重之筴也一可以為十十可以為百引十之半而藏四以五操事在君之決塞桓公曰何謂決塞管子曰君不高仁則國不相

被君不高慈孝則民簡其親而輕過此亂之至也則君請以國筴十分之一者樹表置高鄉之孝子聘之幣孝子兄弟衆寡不與師旅之事樹表置高而高仁慈孝財散而輕乘輕而守之以筴則十之五有在上運五如行事如日月之終復此長有天下之道謂之准道

桓公問於管子曰請問教數管子對曰民之能明於農事者置之黃金一斤直食八石民之能蕃育六畜者置之黃金一斤直食八石民之能樹藝者置之黃金一斤

直食八石民之能樹瓜瓠葷菜百果使蕃裒者置之黃金一斤直食八石民之能已民疾病者置之黃金一斤直食八石民之知時曰歲且阨曰某穀不登曰某穀豐者置之黃金一斤直食八石民之通於蠶桑使蠶不疾病者皆置之黃金一斤直食八石謹聽其言而藏之官使師旅之事無所與此國策之者也國用相靡而足相困揅而善然後置四限高下令之徐疾毆屏萬物守之以策有五官技桓公曰何謂五官技管子曰詩者所以

記物也時者所以記歲也春秋者所以記成敗也行

道民之利害也易者所以守凶吉成敗也卜者卜凶吉

利害也民之能此者皆一馬之田一金之衣此使君不

迷妄之數也六家者即見其時使豫先蚤開之日受之

故君無失時無失筴萬物興豐無失利遠占得失以爲

末教詩記人無失辭行殫道無失義易守禍福凶吉不

相亂此謂君揀

筆永反說  
文與柄同

桓公問於管子曰權揀之數吾已得聞之矣守國之固

奈何曰能皆已官時皆已官得失之數萬物之終始君  
皆已官之矣其餘皆以數行桓公曰何謂以數行管子  
對曰穀者民之司命也智者民之輔也民智而君愚下  
富而君貧下貧而君富此之謂事名二國機徐疾而已  
矣君道度法而已矣人心禁繆而已矣桓公曰何謂度  
法何謂禁繆管子對曰度法者量人力而舉功禁繆者  
非往而戒來故禍不萌通而民無患咎

桓公曰請聞心禁管子對曰晉有臣不忠於其君慮殺

其主謂之公過諸公過之家毋使得事君此晉之過失也齊之公過坐立長差惡惡乎來刑善善乎來榮戒也此之謂國戒

桓公問管子曰輕重准施之矣筴盡於此乎管子曰未

也將御神用寶桓公曰何謂御神用寶管子對曰北郭

有掘闕而得龜者

掘穿也求物反穿地至泉曰闕求月反

此檢數百里之

地也

檢猶比也以此龜為用者其數可比百里之地

桓公曰何謂得龜百里之

地管子對曰北郭之得龜者今過之平盤之中

令力呈反過之

猶置之也平  
盤者大盤也

君請起十乘之使百金之提

起發也提裝也使色吏反

命北郭得龜之家曰賜若服中大夫

若汝也中大夫齊爵也

曰東

海之子類於龜

東海之子其狀類龜假言此龜東海之子耳東海之子者海神之子也

託

舍於若

託舍猶寄居也

賜若大夫之服以終而身

而若也

勞若以

百金

勞賜也

之龜爲無貲

之是也是龜至寶而無貲也無貲無價也

而藏諸泰

臺

秦臺高臺也

一日而繫之以四牛立寶曰無貲

立龜爲寶號曰無貲

還四年伐孤竹

還四年後四年

丁氏之家粟

丁氏齊之富人所謂丁惠也

可

食三軍之師行五月

食音嗣下以意取行五月經五月

召丁氏而命之

曰吾有無貲之寶於此吾今將有大事請以寶為質於

子

質音致  
下皆同

以假子之邑粟

即家  
粟也

丁氏北鄉再拜入粟不

敢受寶質桓公命丁氏曰寡人老矣為子者不知此數

終受吾質丁氏歸革築室賦籍藏龜

革更也賦數也  
籍席也才夜反

還

四年伐孤竹謂丁氏之粟中食三軍五月之食桓公立

貢數文行中七年龜中四千金黑白之子當千金凡貢

制中二齊之壤策也用貢國危出寶國安行流桓公曰

何謂流管子對曰物有豫則君失策而民失生矣故善



爲天下者操於二豫之外桓公曰何謂二豫之外管子  
對曰萬乘之國不可以無萬金之蓄飾千乘之國不可  
以無千金之蓄飾百乘之國不可以無百金之蓄飾以  
此與令進退此之謂乘時

山至數第七十六

管子輕重九

桓公問管子曰梁聚謂寡人曰古者輕賦稅而肥籍斂  
取下無順於此者矣梁聚之言何如管子對曰梁聚之  
言非也彼輕賦稅則倉廩虛肥籍斂則械器不奉械器

不奉而諸侯之皮幣不衣倉廩虛則俸賤無祿外皮幣  
不衣於天下內國俸賤梁聚之言非也君有山山有金  
以立幣以幣准穀而授祿故國穀斯在上穀賈什倍農  
夫夜寢蚤起不待見使五穀什倍士半祿而歿君農夫  
夜寢蚤起力作而無止彼善為國者不曰使之使不得  
不使不曰貧之使不得不用故使民無有不得不使者  
夫梁聚之言非也桓公曰善

桓公又問於管子曰有人教我謂之請士曰何不官百

能管子對曰何謂百能桓公曰使智者盡其智謀士盡其謀百工盡其巧若此則可以為國乎管子對曰請士之言非也祿肥則士不死幣輕則士簡賞萬物輕則士偷幸三怠在國何數之有彼穀十藏於上三游於下謀士盡其慮智士盡其知勇士輕其死請士所謂妄言也不通於輕重謂之妄言

桓公問於管子曰昔者周人有天下諸侯賓服名教通於天下而奪於其下何數也管子對曰君分壤而貢入

市朝同流黃金一筴也江陽之珠一筴也秦之明山之  
曾青一筴也此謂以寡爲多以狹爲廣軌出之屬也桓  
公曰天下之數盡於軌出之屬也今國穀重什倍而萬  
物輕大夫謂賈之子爲吾運穀而歛財穀之重一也今  
九爲餘穀重而萬物輕若此則國財九在大夫矣國歲  
反一財物之九者皆倍重而出矣財物在下幣之九在  
大夫然則幣穀羨在大夫也天子以客行令以時出熟  
穀之人以諸侯受而官之連朋而聚與高下萬物以合

民用內則大夫自還而不盡忠外則諸侯連朋合與熟穀之人則去亡故天子失其權也桓公曰善

桓公又問管子曰終身有天下而勿失爲之有道乎管子對曰請勿施於天下獨施之於吾國桓公曰此若言何謂也管子對曰國之廣狹壤之肥瘠有數終歲食餘有數彼守國者守穀而已矣曰某縣之壤廣若干某縣之壤狹若干

國之廣狹肥瘠人之所食多少其數君素皆知之

則必積委幣

委蓄

也各於縣州里蓄積錢幣所謂萬室之邑必有萬鍾之藏藏繼千萬千室之邑必有千鍾之藏藏繼百萬於

是縣州里受公錢

公錢即積  
委之幣

秦秋國穀去參之一

去滅  
也丘

呂君下令謂郡縣屬大夫里邑皆籍粟入若干穀重一

也以藏於上者

一其穀價  
以收藏之

國穀參分則二分在上矣

先言

貯幣於縣邑當秋時下令收糴也則魏李悝行平糴之法上熟糴三捨一中熟糴二捨一下熟中分之益出於此今言去三之一者約中熟為準耳

秦春國穀倍重數也秦夏賦穀以市

橫

古莫  
反

民皆受上穀以治田土秦秋田穀之存予者若

干今上歛穀以幣民曰無幣以穀則民之三有歸於上

矣

言當春穀畧之時計其價以穀賦與人秋則欲其幣雖設此今本意收其穀入既無幣請輸穀故歸於上

重之相因時之化舉無不為穀筴

重之相因若春時穀  
發與穀也時之化舉

若秋時穀賤收穀也因時  
之輕重無不以術權之

君用大夫之妾以流歸於上

君用民以時歸於君藏輕出輕以重數也則彼安有自

還之大夫獨委之彼諸侯之穀十使吾國穀二十則諸

侯穀歸吾國矣諸侯穀二十吾國穀十則吾國穀歸於

諸侯矣故善為天下者謹守重流

重流謂嚴守穀  
價不使流散

而天

下不吾洩矣

洩散也吾  
穀不散出

彼重之相歸如水之就下吾國

歲非凶也以幣藏之故國穀倍重故諸侯之穀至也是

藏一分以致諸侯之一分利不奪於天下大夫不得以  
富侈以重藏輕國常有十國之筴也故諸侯服而無正  
臣橫從而以忠此以輕重御天下之道也謂之數應

桓公問管子曰請問國會管子對曰君失大夫爲無伍  
失民爲失下故守大夫以縣之筴守一縣以一鄉之筴  
守一鄉以一家之筴守家以一人之筴桓公曰其會數  
奈何管子對曰幣准之數一縣必有一縣中田之筴一  
鄉必有一鄉中田之筴一家必有一家直人之用故不



以時守郡為無與不以時守鄉為無伍桓公曰行此奈  
何管子對曰王者藏於民霸者藏於大夫殘國亡家藏  
於篋桓公曰何謂藏於民請散棧臺之錢散諸城陽鹿  
臺之布散諸濟陰君下令於百姓曰民富君無與貧民  
貧君無與富故賦無錢布府無藏財貨藏於民歲豐五  
穀登五穀大輕穀賈去上歲之分以幣據之穀為君幣  
為下國幣盡在下幣輕穀重上分上歲之二分在下下  
歲之二分在上則二歲者四分在上則國穀之一分在

下穀三倍重邦布之籍終歲十錢人家受食十畝加十  
是一家十戶也出於國穀筴而藏於幣者也以國幣之  
分復布百姓四減國穀三在上一在下復筴也大夫聚  
壤而封積實而驕上請奪之以會桓公曰何謂奪之以  
會管子對曰粟之三分在上謂民萌皆受上粟度君藏  
焉五穀相靡而重去什三為餘以國幣穀准反行大夫  
無什於重君以幣賦祿什在上君出穀什而去七君歛  
三上賦七散振不資者仁義也五穀相靡而輕數也以

鄉完重而籍國數也出實財散仁義萬物輕數也乘時  
進退故曰王者乘時聖人乘易桓公曰善

桓公問管子曰特命我曰天子三百領泰晉而散大夫  
准此而行此如何管子曰非法家也大夫高其壟美其  
室此奪農事及市庸此非便國之道也民不得以織爲  
繆綃而狸之於地彼善爲國者乘時徐疾而已矣謂之  
國會

桓公問管子曰請問爭奪之事何如管子曰以戚始桓

公曰何謂用戚始管子對曰君人之主弟兄十人分國  
爲十兄弟五人分國爲五三世則昭穆同祖十世則爲  
祏故伏尸滿衍兵決而無止輕重之家復游於其間故  
曰母子人以壤母授人以財財終則有始與四時廢起  
聖人理之以徐疾守之以決塞奪之以輕重行之以仁  
義故與天壤同數此王者之大轡也

桓公問管子曰請問幣乘馬管子對曰始取夫三大夫  
之家方六里而一乘二十七人而奉一乘幣乘馬者方

六里田之美惡若干穀之多寡若干穀之賤賤若干凡  
方六里用幣若干穀之重用幣若干故幣乘馬者布幣  
於國幣為一國陸地之數謂之幣乘馬桓公曰行幣乘  
馬之數奈何

即臣乘馬所謂篋乘馬者臣猶實也篋者以幣為篋而洩重射輕

管子對

曰士受資以幣大夫受邑以幣人馬受食以幣則一國  
之穀資在上幣資在下國穀什倍數也萬物財物去什  
二筴也皮草筋角羽毛竹箭器械財物苟合於國器君  
用者皆有矩券於上

矩券常券

君實鄉州藏焉

周制萬二千五百為鄉二

千五百家為黨為州  
齊雖霸國尚用周制  
曰某月某日苟從責者責讀為債鄉決

州決故曰就庸一日而決國筴出於穀軌國之筴貨幣

乘馬者也

貨價也言應合受公家之所給皆與之幣則穀之價君上權之其幣在下故穀倍重其有

皮革之類堪於所用者所在鄉州有其數若今官曹簿帳人有負公家之債若耒耜種糧之類者官司如要器用若皮革之類者則與其准納如要功庸者今就役一日除其簿書耳此蓋君上一切權之也詳輕重之本旨推抑富商兼并之家隘塞利門則與奪貧富悉由號令然可易為理也今乃布藏於官府

巧幣萬物輕重皆在賈之彼幣重而萬物輕幣輕而萬物重彼穀重而穀輕人君操穀幣金衡而天下可定也

此守天下之數也

桓公問於管子曰准衡輕重國會吾得聞之矣請問縣數管子對曰狼牡以至於馮會之日龍夏以北至于海莊禽獸羊牛之地也何不以此通國筴哉桓公曰何謂通國筴管子對曰馮市門一吏書贅直事若其事唐圉牧食之人養視不失扞殂者去其都秩與其縣秩大夫不鄉贅合游者謂之無禮義大夫幽其春秋列民幽其門山之祠馮會龍夏牛羊犧牲月賈十倍異日此出諸

禮義藉於無用之地因捫牢筴也謂之通

桓公問管子曰請問國勢管子對曰有山處之國有汜  
下多水之國有山地分之國有水洸之國有漏壤之國  
此國之五勢人君之所憂也山處之國常藏穀三分之  
一汜下多水之國常操國穀三分之一山地分之國常  
操國穀十分之三水泉之所傷水洸之國常操十分之  
二漏壤之國謹下諸侯之五穀與工雕文梓器以下天  
下之五穀此准時五勢之數也



桓公問管子曰今有海內縣諸侯則國勢不用已乎管子對曰今以諸侯爲等公州之飾焉以乘四時行捫牢之筴以東西南北相彼用平而准故曰爲諸侯則高下萬物以應諸侯徧有天下則賦幣以守萬物之朝夕調而已利有足則行不滿則有止王者鄉州以時察之故利不相傾縣歿其所君守大奉一謂之國簿

管子卷二十二

謹案卷二十一第三頁前七行請謁任舉刊本舉

訛譽據卷一立政篇改

第五頁前八行置不能圖刊本置訛寡據卷一立

政篇改

第十頁前三行脩長存乎任賢刊本脩訛備據卷

一立政篇改


第十八頁前二行則民務交而不求用矣刊本交

訛倭據卷十五明法篇改

卷二十二第十一頁前七行請問官國軌刊本官

訛宮今改

第十三頁前八行為之有道乎刊本乎訛于今改



總校官庶士<sub>臣</sub>侍朝

校對官檢討<sub>臣</sub>王鍾健

謄錄監生<sub>臣</sub>張君紱